



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma :



Tir Yimym



tiryimym@aolima



tir yimym

TAPAK 3

**Jannik Sinner-i Grigor Dimitrov
koka Miami Open benogo**

**Sanjay Singh nem Supreme
Court-i bail agütsüogo**



VOL. XXI ISSUE NO. 170 (ADOK 170) DIMAPUR RASEMNÜ (WEDNESDAY) RONGCHII (APRIL) 03, 2024 ₹ 5.00

April 16 tashi tsüingsang majungtsü: NSDMA

Dimapur, April 2, 2024 (TYO): Nagaland State Disaster Management Authority (NSDMA)-i Nagaland nung April 16, 2024 tashi tzüinglu kanga arutsü, tsüingi aitsü aser mopung tesashi aontsü osang metetdaksüogo.

Nagaland State Disaster Management Authority (NSDMA)-i Indian Meteorological Department (IMD) Regional Office den yaritepa Mongulbarnü tsüingsang majungdang aser yipru mapang teinyaktsü aser meinyaktsü kar metetdaksüogo.

Peren, Dimapur, Kohima, Phek, Wokha, Zunheboto, Kiphire, Mokokchung, Shamator, Tseminyu aser Tuensang nung mopung ona tzüinglu kanga arutsü ta NSDMA-i ashi.

Nagaland nung tatsüktiba temperature ji 31? aser temekongtibaji 11? asütsü.

NSDMA-i tetuyuba agütsü:

1. Traffic tetuyuba sülen anidakang.
2. Kiojen tashimait nung malitsüla.
3. Alu nung tzi aolen shitak yuang.
4. Aonsotsü ayokba ki akangshiang.
5. Tsüingsang majungdang kima nung mekazütsüla.
6. Yipru aser tsüingi aidang kilung nung jenokang.
7. Ajungketa yangluba tesem aser kima nung tawa nung mekazütsüla.
8. Tsüingi nungi kümzüka alitsü atema yin aser electric yinzü anasa malitsüla.
9. Electrical appliances kümzüka ayutsü atema unplug süang.
10. Tanur aser kiset shirurutem lendong nungi kümzüka yuang.
11. Lendong ataloktsüsa alilba janatem agienang.
12. Tsüingi aidang mobile phones tamshi.

Nagaland Police-i Babar Uddin osang jangjashitsür

Dimapur, April 2, 2024 (TYO): Assam kübok Sonitpur nung Nur Uddin'er jabaso Babar Uddin ya North East nung Narcotic Drug traffickers tetsüdi rongnung ka lir aser pa den külemi Dimapur, Nagaland aser Imphal, Manipur nung nisung ana puogo.

Babar Uddin-i Dimapur Nagaland nungi Narcotic Drug shibelenba mapa inyaka aser pai Manipur nungi bener aruba sülen Nagaland o Assam nung yokshi ta Nagaland Police-i ashi.

Nagaland aser linük kübok tesem balala nung Ganja aser Sunflower/Shanflower (Heroin) shibelenba atema Babar Uddin anema ken o aika benoka lir ta parnokisa ashi.

Babar Uddin apuba sülen Nagaland Police-i Dimapur nung



tesem aika mita ogo aser idangji taitüsü aketba kulitem aika ngutetogo. Tesem balala nung kulikaketem, bank dak sendakba papers, passbooks, Sim cards (tiyazü tenung nung yangluba) aser telephone devices (mobile handsets) aika ngutetogo.

Babar Uddin-i tesüiba ita 6-10 tsüingda Manipur nungi

Sunflower/shanflower (Heroin) sapon pongdang 800 tema alizüker bener arua yokshiba bushitetogo. Maneni pai 1995 nungi Ganja shibelenba mapa inyaka arur, ta Nagaland Police-isa ashi.

Police-i iba ken o maneni bushisüngdang südar aser tarutsü anogotem osang tejangjaba metetdaksütsü shiogo.

Nagaland Police-isa public dang mozü shibelenertem indang osang metetdaksütsü mepishia metetdaksüogo.

Drugs anema bushisüngdanga arudang Angami Public Organization, Angami Youth Organization, Dimapur Ao Youth Organisation aser tanga CSOs-i onok den yaritepba atema pelar ta Nagaland Police-isa ashi.

Arunachal ya India nung shilem ka: Kiren Rijiju

Guwahati, April 2, 2024 (Agencies): China-i Arunachal Pradesh nung tesem aika tenung melenshiba aitsür aser iba inyakyim ajanga kecha memelenshitsu ta Union Minister Kiren Rijiju-i ashi.

"China-i ozüingalema Arunachal Pradesh telung nung tesem 30 tenung agütsüba aitsür. China-i iba ama kuli maliba ontüktem jembir saka iba ajanga kecha masütsü aser putiotsü kulitem memelentsü" ta Rijiju-i ashi.

"Arunachal Pradesh ya India kübok shilem ka lir aser Arunachal Pradesh nungeri ya

India sensotem lir" ta pai ashi. "Arunachal Pradesh ya India nung state ka liasü, tanga lir aser maneni alitsü" ta External Affairs Minister S Jaishankar-i Hombarnü ashi.

"Tanü ni nür ki tenung melenshira, ozü ki akümstü asü?" ta Jaishankar-isa asüngdang.

"Tenüngtem melenshiba ajanga Arunachal Pradesh litsü mekongshitsu. Asen army idakji (Line of Actual Control) mapa lemsüka lir" ta paisa ashi.

China-i Arunachal Pradesh dang Zangnan ta ajar aser par litsü ta shiyonga arur.

Manipur sorkari ita 6 atema AFSPA atsülanger

Imphal, April 2, 2024 (Agencies): Manipur sorkari April 1, 2024 nungi state ajungalen Armed Forces (Special Powers) Act (AFSPA) ozüing atsülangogo.

Ajisüaka AFSPA ya Imphal nung municipal areas aser police stations 19 nungbo benoka mali.

Governor Anusuiya Uikey-i police stations 19 dak alaka Manipur state ajunga "disturbed area" sangoktsüogo ta Devesh Deval, Commissioner (Home)-i ashi.

Manipur nung Kuki-Zo nunger aser ano tanga teloktemi

AFSPA benokba ya magizüker.

Northeastern state tem nung Meitei, Naga aser Kuki nunger loktitentet balalai armed forces mem tashi balaka agütsüba ozüingtem agientsü takhangba agüja arur.

AFSPA ajanga armed forces nem tashi balaka agütsür. AFSPA kübok armed forces-i ozüing alema inyaker ama temulung bilemba nisung khasetsü tashi lir. Parnoki warrants melii nisung aputsü aser mita aotsü tashi angur aser Centre sorkar nungi temelaba malii tashi armed forces anema bushisüngdang asütsü makok.

Taoba PM Dr. Manmohan Singh Rajya Sabha nungi anisüngzüker



February 8, 2024 nü taoba Prime Minister Dr. Manmohan Singh-i Rajya Sabha nung adentsü atema arudang agiba noksa ka angur. (file)

New Delhi, April 2, 2024 (Agencies): Taoba Prime Minister aser Congress lennir tejen Dr. Manmohan Singh-i Mongulbarnü Rajya Sabha züngsem nungi sodi agiogo. Küm 33 tashi Parliament nung shilem agia aruba sülen pa kümsük agi tonger anisüngzüker.

Dr. Manmohan-i October 1991 nungi Rajya Sabha MP ka ama inyaktsü tenzük aser Indian politics nung jenjang tajung yangluteta yutsüogo. 1991 nungi 1996 tashi Narasimha Rao sorkar kübok pai Union Finance Minister inyak aser 2004 nungi 2014 tashi Prime Minister inyak.

"Dr. Manmohan Singh-i linük asoshi mapa tajung aika inyaktsüogo aser iba atema pa nem tenüngsang agütsür. Pai politics toktsüba asoshi sasa bilemer. Dr. Manmohan-i kanga dang bendanga agüja public service inyakogo aser India rongsenketzüng jenjang

yanglushitsu aser sensotem asoshi bilema mapa aika inyaktsüogo" ta Congress President Mallikarjun Kharge-i ashi.

Dr. Manmohan-i mapa tamajung nung linük len aniego aser talisa Indo-US Nuclear Deal aser Global Financial Crisis mapang pa lenisüba kübok maparen inyaka liasü. MGNREGA scheme ama mapatem ajanga Dr. Manmohan-i sensakertem asoshi inyaktsüba kuli agütsür, iba scheme ajanga nisung million aika sensaktia nungi anitetogo, ta Kharge-isa metetdaksü.

"Indian Prime Minister-i kodang ojembidir alima ajungai pai ashiba angar ta President Obama-i ashiba ni bilemteter" ta Kharge-i Dr. Manmohan dang ashi.

Mongulbar aser Bodbar anogotem Rajya Sabha züngsem 54 kümsük agi tonger sodi angutsü.

Parnok rongnung Union minister 7 Mongulbarnü kümsük tembangogo. Parnokji Education Minister Dharmendra Pradhan, Health Minister Mansukh Mandaviya, Animal Husbandry and Fisheries Minister Purshottam Rupala, Information Technology Minister Rajeev Chandrasekhar, MoS External Affairs V Muraleedharan, Micro, Small and Medium Enterprises Minister Narayan Rane aser MoS Information and Broadcasting L Murugan nung lir.

Maneni, Bodbarnü Environment Minister Bhupendra Yadav aser Railway Minister Ashwini Vaishnaw na kümsük agi tonger sodi angutsü.

Ashwini Vaishnaw dak alaka tanüngba Union minister ajaki Lok Sabha elections nung tokteptsü.

Rajya Sabha nung April 2, 2024 nü züngsem 49 aser April 3, 2024 nü 5 kümsük agi tonger anisüngzüker.

DIMAPUR AO BAPTIST AROGO HEALING MINISTRY TANEPTSÜ SENTONG

DABA main church Duncan nung April 3, 2024 anepdang 7:00 am nungi sentong tenzüktsü. Tamang agi arung, ali mozü agi manepetba Tashidak Tsüngremibo aneptsütet. Tsüngrem asoshi kecha tamakoktsü malia. Yisui la dang ashi "Tenü nü tamang agi na junga kümogo... Junga liang." Mark 5:34.

Sd/-
Pastor, DABA.

Directorate of Health & Family Welfare nung tepila sentong ka agi



Dimapur, Rongchii/April 02 (TYO): Directorate of Health & Family Welfare nung ketdangsür mapa yutsür Dr. Ritu Thurr, Principal Director; Dr. Toshirena, Director; Dr. Khrielasanuo, Addl. Director; Dr. Lhouvizotuo Belho, Jt. Director; W. H Patton, Addl. Drug Controller aser Radile, Jt. Director Nursing nungertem atema tepila sentong ka April 02, 2024 nü agia liasü.

Iba sentong nung Dr. Akuo

Sorhie, Director (Health) menden liasü aser Dr. Vezokholu Theyo, Jt. Director ajanga Lai zünga sarasadem. Iba sülen Dahil Pfithu aser Pelesa Keyho nati temeja ken aten aser iba sülen Department tenüing nung Dr. E. Motsuthung Patton, Principal Director, DHFW tasenba ajanga o jembia liasü. S. Tainiu, Addl. Secretary, H&FW Govt. of Nagaland ajanga iba sentong nung jembidang mapa nungi

anisingzükür temi küm 35 tashi bendanga agütsür Department tenzüka atema pelaba lemsatöp aser tenüingsang agüja liasü. Laisa parnok mapa nungi anisingzükera pela aser jangratema anisingzükera alitsü moaja liasü aser nungdakba mapang Department den shisatsü agi yariteptsü ayongzük.

Iba sentong ya Dr. Tinurenla Anichari, Dy. Director ajanga sarasadema tembang.

Pungro nung Oral Cancer Screening camp ali

Dimapur, Rongchii/April 02 (TYO): World Oral Cancer Screening Month nungtem nung moko ajanga school azünger dak temang nung timtem agütsüba asoshi screening camp ka Christian School aser Government

Primary School, Pungro, Kiphire nung April 1, 2024 nü agia liasü.

Iba camp nung CHC Medical Officer, Dr. Weri Mero totuyuba kübok Pungro Community Health Centre (CHC) nungi medical team kati

iba camp ayongzükera liasü. Iba camp nung kaketshirtem oral cancer screening agi aser minor dental procedure agia liasü.

Iba camp nung screening den külemi kaketshir nem oral health education angazükdakja liasü.

Kohima nung ONDC indang awareness sentong ali



Open Network for Digital Commerce (ONDC) indang awareness sentong ka April 2, 2024 nü Directorate of Industries & Commerce, Kohima nung agidang tangokba noksa ka yangi angur.

Dimapur, Rongchii/April 02 (TYO): Open Network for Digital Commerce (ONDC) indang awareness sentong ka April 2, 2024 nü Directorate of Industries & Commerce, Kohima nung agia liasü.

Iba sentong nung Commissioner & Secretary, Industries & Commerce, Kekhrievor Kevichusa, IPoS ajanga ashiba agi, network commerce atema Open digital ya Government of India-i online demands peritsüsa local retail ecosystems nem goods and service tsütsü digital network agütsütsü aser business tajungba kumdakja acquisition cost, digital presence costs aser inventory costs amala ajemdaktsütsü nükjidong nung tenzü.

Nagaland nung logistics service providers peria mali aser yimdak yimtsüing kar mawajemteti yutsür, anungji ONDC yagi item ajakji awajema e-commerce ya tali

tajungba kuma talir aser tayoker ajaki amshitetsü aser ibaji ajanga rongsenketzüing renlokba nung yaritsü aser logistics, packaging aser last-mile delivery densema digital commerce value chain nung opportunities adokdaktsütsü, ta Kevichusa-i ashi.

ONDC yagi local markets atongba nung local entrepreneurs tem yarir ta pai ashi aser business tila süang-tulua süang mesüra tesem balala nung alirtema e-commerce nung shilem agitsü ajungshia liasü.

Nagaland nung iba ama sentong ayongzükba ya tang mezüingbuba alitsü, ta Senior Vice President Institutional & Government banking, Yes Bank Limited, Ravi Roy-i pelaba lemsatöp aser ibai ONDC aser Department of Industries & Commerce atema mapang tajung lir, ta ashi.

Digital commerce atema open network ya market democratise asütsü atema lir,

kechiaser tarutsü nung e-commerce ya tongtipang akumtsü aser takum melenshidaktsüba nung tejakleni asangsang nung aor, ta Ravi-i ashi.

Nagaland nung teinyaktsü jenti lir aser e-commerce nung tetsüing ajemoktsü tangya mapang shidak lir, aser iba ya ajanga local entrepreneurs yaritsü aser ONDC ajanga gift cards agütsütsü aser ibaji amshia e-commerce platform ajak nung lijaliyongba mapang amshitetsü, ta paisa ashi.

Iba sentong nungsa Pooja Bajaj Bagaria, ONDC Team, DPIIT, Yaikhomba founder Addble Solutions Private Limited aser Daniel Domeh, System Manager Post Office Kohima, Nagaland nungeri technical session ka agia Open Network for digital commerce, Addble Solutions Private Limited aser Book Now Pay Later (BNPL) onüktem nung jembia liasü.

Dimapur nung election ketdang-sürtem atema training tanabuba agitsü

Dimapur, Rongchii/April 02 (TYO): Aruya aliba Lok Sabha election asoshi Deputy Commissioner & District Election Officer, Dimapur office ajanga sangdong ka nung Dimapur, Nuiland aser Chümoukedima nung polling ketdangsürtem training agitsü metetdaktüsügo.

Iba training ya 1st Polling Officers, 2nd Polling Officers, 3rd Polling Officers aser Grade IV staff tem nem nungdakba inyakyim angazükdaktsütsü aser election maparen asoshi protocol sayutsü nükjidong nung agütsütsü.

Sangdong nung DC & District Election Officer,

Dimapur, Tinojongshi Chang, NCS ajanga ashiba agi, Presiding Officers aser 1st Polling Officers atema training ya April 4, 2024 nü Dimapur Government College, Dimapur nung anepdang 10:00 ako nungi tenzüktüsü.

Iba sülen 2nd aser 3rd Polling Officers atema training ya April 5, 2024 nü Dimapur Government College, Dimapur nung anepdang 10:00 ako nungi tenzüka agitsü.

Aruya aliba Lok Sabha election mapang polling officials temi pei mapa shidak inyaktüsü atema iba training ya kanga tongtipang lir, ta sangdong ajanga ashi.

Kohima district atema polling personnel randomization agi



Dimapur, Rongchii/April 02 (TYO): P. Ramesh, IAS, General Observer (Observer Code G-18147) aser Kumar Ramnikant, IAS, Deputy Commissioner and District Election Officer, Kohima nung April 2, 2024 nü Kohima

District atema Polling Personnel tanaben randomization agia liasü.

Lok Sabha election 2024 tonga aruba mapang election maparen ochishia inyaktüsü nükjidong nung iba mera ya agia liasü.

Longleng nung election ketdangsürtem training agitsü

Dimapur, Rongchii/April 02 (TYO): Longleng nung Presiding Officers, First Polling Officer, Second Polling Officer, Third Polling Officer aser MTS atema training April 8 & 9, 2024 anogotem agitsü, ta Deputy Commissioner & District Election Officer, Longleng ajanga sangdong ka nung ashi.

Longleng Town nung aser temeket nung aliba polling personnel temi Bautung GHSS, Longleng nung April 8, 2024 anepdang 9:30 ako nungi agitsü aliba training nung adentsü akok, ta ashi.

Tamlu Sub-Division nung aser temeket nung aliba polling personnel tem atema training ya April 9, 2024 anepdang 10:00 ako nungi tenzüka ADC Office,

Tamlu nung agitsü.

Tang tashi EDC apply mesüi aliba polling personnel temi EPIC Card/ Govt. service ID card photo copy den passport noksa ana-na bener arua Election Duty Certificate (EDC) & Election ID card meshitsü akok, ta sangdong ajanga ashi.

Maneni sangdong ajangasa Head of Departments aser Nodal Officers tem dang pei staff tem dang iba training indang osang metetdaktüsü totuyuba agütsügo.

Training nung madener aser aibelener nem The Representation of the People Act, 1951 indang Section 134 nung shia aliba ama temerenshi agütsütsü, ta sangdong ajangasa ashi.



Lok Sabha election duty atema mapa alemtsü asoshi polling personnel (Grade IV) tem Town Hall, Peren nung April 2, 2024 nü tenüing zuluokba mapang tangokba noksa nung angu

ST. EDMUND'S COLLEGE, SHILLONG

(Private Post Teachers)

Applications for the following posts are invited:

- (a) Psychology (NET) - 2
- (b) Counsellor (3-5 years experience) - 1
- (c) English (NET), Experience in teaching Phonetics & Prosody - 2
- (d) Computer Application (NET) - 1

Accommodation for female (single) person is available for (a) & (b) above.

Kindly apply on or before 20th April 2024 by visiting

Website : <https://sec.edu.in>

ADMISSIONS (2024-2025)

Any student, who registers for admission in St. Edmund's College website, can avail of the online materials for CUET - 2024

Congress-i Lok Sabha candidate 17 tenüng sangdongogo



Y S Sharmila Reddy

New Delhi, Rongchii/April 2 (Agencies): Taruba Lok Sabha election atema Congress party-i Mongolbarnü candidate 17 tenüng sangdongogo, kong Andhra Pradesh state unit tir Y.S. Sharmila Reddy Kadapa menden nungi tokteptsü atema shimba densema lir.

Hombarnü sangdongba list nung Odisha nungi candidate ti, Andhra Pradesh nung pongu, Bihar nungi asem aser West Bengal nungi ka lir.

Bihar nung grand alliance den menden lemdangtsü atema tenangzüktepa yangluba nung shilem ka ama Congress nem menden teku agütsüogo aser menden teku rongnungi Congress-i Kishanganj, Katihar

asir Bhagalpur atema candidate sangdongogo. Congress MP Mohammed Jawed, Kishanganj Lok Sabha menden, lenir tejen Tariq Anwar, Katihar nungi aser Congress MLA Ajeet Sharma Bhagalpur Lok Sabha menden nungi tokteptsü.

Congress-isa, taoba education minister M. M. Pallam Raju Andhra Pradesh kübok Kakinada nungi tokteptsü atema shimogo.

Taoba Lok Sabha züngsem Sanjay Bhoi, Odisha nung Bargarh constituency nungi tokteptsü.

Candidate tem rongnung M.M. Pallam Raju, Gidugu Rudra Raju, J.D. Seelam, PG

Rampullaiah Yadav, Y.S. Sharmila Reddy, Mohammad Jawed, Tariq Anwar, Ajeet Sharma, Sanjay Bhoi, Janardan Dehury, Manoj Mishra, Draupadi Majhi, Bhujabal Majhi, Amir Chand Nayak, Amir Chand Nayak, Saptagiri Sankar Ulaka aser Dr. Munish Tamang densema lir.

Mongolbarnü sangdongba candidate tem densema Congress-i tang tashi nung candidate 228 sangdongogo.

Ajisüaka kanga dang tongibang Amethi aser Raebareli menden atema candidate tang tashi meshimi lir.

Congress-i Hombarnü taruba Lok Sabha elections atema candidate list 10buba sangdongogo. Hombarnü Maharashtra kübok Akola menden aser Telangana nung Warangal menden atema candidate sangdongogo. Akola menden atema candidate sangdongba ajanga Maharashtra nung Prakash Ambedkar-i aniba Vanchit Bahujan Aghadi (VBA) party den longjemtsü akok ta bilema aliba tembangtsüogo.

Iba menden atema Congress party nungi Abhay Kashinath Patil aser VBA tekolakba Prakash Ambedkar na tokteptsü.

'PM-i India indang ali Bangladesh nem agütsü': Farooq Abdullah

New Delhi, Rongchii/April 2 (Agencies): Taoba Jammu & Kashmir CM aser National Conference tekolakba Farooq Abdullah-i Katchatheevu asetkong indang onük jembiba mapang, Nepal-i India indang ali atsüba dak sendakba nung BJP sorkari kecha minyak ta ashiba den Bangladesh nem India indang ali agütsüba atema Ato Kilonser Narendra Modi aitsüogo.

Indira Gandhi-i 1974 küm Katchatheevu asetkong ya Sri Lanka nem agütsü ta BJP puri ashiba mapang ka nung Abdullah-i iba olen lemsatepogo.

"PM-i India indang ali Bangladesh nem agütsü. China-i Ladak atsüngogo aser yashi Arunachal Pradesh nung yimtsüngtem tenüng agiogo.

Parnoki iba indang kecha mashitsü. Nenoki tangar dak temeyong tuloktsüba mapang meyiper temeyong aseme nenok dak tuloktsüdar ta metetdang," ta Abdullah-i ashi.

PM Modi-i, Katchatheevu ken o benoka jembiba mapang Congress-i linük yimsüsüba mapang India telongjem, integrity aser tejangraba tashi meiti kümdaktsüba atema Congress aija liasü.

Asür DMK MP Era Sezhiyan, shibai Indira Gandhi-i aniba sorkar mapang India aser Sri Lanka na Maritime tenangzüktepa yangluba temulung mesüi jembiba liasü pa indang PM-i Lemsatepa liasü. India-i Katchatheevu asetkong agüjatokba atema temulung mesüi Sezhiyan-i iba ya memeshiba tenangzüktepa ka

lir shia liasü. Paisa, Katchatheevu asetkong ken o dak sendakba nung Tamil Nadu nung DMK party-i shilem agiba atema parnoka aija liasü.

Kasa mapang nung Tamil Nadu BJP tekolakba K Annamalai-i, India nung angopurtem kümzüka toktsütsü atema Modi-i aniba sorkari Katchatheevu asetkong meyipa agitsü merangdar, ta ashi.

"Katchatheevu ya taoba Tamil Nadu CM Karunanidhi-i temelaba agüja Sri Lanka nem agütsü. Pai Kewal Singh - taoba External Affairs Minister den jembiba liasü. Tang BJP-i Katchatheevu meyipa agitsü atema EAM Jaishankar nem shiti ka agütsüogo," ta Annamalai-i osangbenertem dang ashi.

ECI-i Lok Sabha election atema Special Observer shimogo

New Delhi, Rongchii/April 2 (Agencies): Taruba Lok Sabha election kecha Special Observers tem yokba Election Commission of India (ECI)-i sangdongogo.

Special Observers (General aser Police) tem ya West Bengal, Uttar Pradesh, Maharashtra, Bihar nungeri yokogo. Andhra Pradesh, aser Odisha na nungbo state aser Lok Sabha election külemi agitsü, kong nütsünyongsük crore 7 dak tema lir.

Observers tem yagi achaayanga personnel, security forces, aser voting machine tem lemdangtsütsü.

Election mapang sen tashi amshiba, yi alemba, angati osettsü alemba ken o tem achaayangtsü atema Andhra Pradesh, Karnataka, Odisha, Tamil Nadu, aser UP-i special expenditure observer tem yokogo aser iba ajanga election

expenditure monitoring tashi taitba kümdaktsütsü.

Taoba mapang civil servant tem shirnok election inyakim nung mongintem aser tajangshiba aika bona lir parnok Special Observers asütsü shimogo. Parnok mapaji election kechi tetsükdaktsü makai sadem sadema agitsü aser democratic inyakim raksatsütsü merangba inyakimtem nokdangtsü atema lir.

Ketdangsurtem list den külemi ECI-isa, Special Observers tem shilem aser khuret indang list ka agütsüogo, kong Observers tem parnok tata tesem nung amenoka alitsüba, agency balala regional tekolak aser nodal officer tem den sendaktepa inyaksangshitsüba, election guidelines aser temzüng ozüng sülen tashi anga anidakdaksütsü atema rangloker inyaktsüba densema lir.

Sanjay Singh nem Supreme Court-i bail agütsüogo



New Delhi, Rongchii/April 2 (Agencies): Delhi excise policy ken o nung tepuokdak yua aliba Rajya Sabha MP Sanjay Singh nem bail agütsütsü atema Supreme Court-i telemtetba agiba Aam Aadmi Party-i pelashishia agizükogo.

SC-i obendang agütsüba sülen osangbenertem den sensaksemba mapang Delhi minister Saurabh Bharadwaj-i ashiba agi, "Supreme Court-i ashiba agi, nisung kati olen 11 jembiba nungi 10 bo magizük aser Sanjay Singh anema olen ka jembibabo agizüka pa tepuokdaki yok aji kodasür agizüketttsü. Supreme Court-isa, sen kar danga ngutet mongutet iba indang asüngdang. Iba dak sendakba nung ED-i telangzüba kecha magütsütet. Tanü ya democracy atema anogo tulu ka lir."

"March 21 nü ya anogo tulu ka liasü aser iba anogo nungi tenzüka inyakim melechia arudar. Tanü April 2 nü AAP tebilemstü kar pongtokogo. Tanü Sanjay Singh-i bail atema mepeshiba Supreme Court-i

angashiogo aser obendangeri Centre aser ED dang ken o kar asüngdang koba parnoki melangzüteti liasü," ta AAP lenir yagi ashi.

Kasa mapang nung Delhi minister Atishi-i, "tanü party lenir Sanjay Singh nem bail (excise policy ken o) agütsüba ajanga ochi teti jungkai adoker ta sayuogo. Nenoki ochibaji nembanga yutettsü saka maitoktetsü. AAP lenir tongtibangtem ken o taila nung apuba nenok ajaki nguogo. Tanü tongtibang ken o ana temai adokogo," ta ashi.

Ajisüaka Bharatiya Janata Party (BJP)-i ashiba agi, central agency tem mang ayangtsü atema amshir ta tanü nungi AAP-i meshitetsü.

ED-i bail application anema menokdakba sülen Singh shiba taoba küm October ita pua liasü pa nem Supreme Court bench kati bail agüja liasü. Bench-i ashiba agi, AAP lenir yagi yimden yimsüsüba nung maneni shilem agitettsü saka ken o dak sendakba nung kecha mejembitettsü.



TIR YIMYIM YIMOBILEM (EDITORIAL)

DIMAPUR RASEMNÜ, APRIL (RONGCHII) 03, 2024

Ochi Pukümer Ka Tepuokdak

- *Tangsen Lemtur*

2015 aser 2020 küm Delhi Assembly elections nung Ato kilonser Narendra Modi-i anir Union minister tem aser BJP nung tongti ketdangsertemi nübo aser rongsen jenti indoka nüboyima liasü, ajisüaka parnoki Arvind Kejriwal-i aniba AAP madak takok mengutetbaji tanga kecha masü saka Delhi nung alirtemi AAP dak tajung chitetba agi lir ta bilemer. AAP-i Delhi nung dang masü saka Punjab assembly elections nunga takok ngua sorkar tentetogo aser tangbo AAP ya National Party ka kümogo. 2011 küm nungi Anna Hazare-i linük nung ochimashi anema nokdakba mapang Kejriwal-ia tongti shilem agia liasü, iba sülen Kejriwal-i yimtenren nung ajemok. Delhi nung AAP sorkari sensakertem dak rangloker inyakba, sorkar school tem jenjang ajungkettsüba, Mohala Clinics ajanga shirangertem angati anepaluba aser tzü den külemi light atsükba unit 200 tashi angati agütsüba ajanga nüburtemi AAP dak tajung chitetogo. Taoba mapang Gujarat nung Chief Minister aser tang Ato kilonser teinyakdak, Modi-i aiben 'Gujarat Model' indang jembia aru saka tanga state temi Gujarat model magi. Kejriwal-ia 'Delhi Model' indang jembia Punjab assembly election nung takok angu aser 'Delhi Model' indang jembia state aika nunga ajemoker. Yimtenren tsütsü Kejriwal kanga nungtugu akümba mapang ka nung tamalen Delhi excise policy ochimashi ken o dak sendakba nung tawa Enforcement Directorate (ED)-i Kejriwal apu aser tang Tihar Jail nung puoka lir, ajisüaka maneni pai jail nungi Delhi Chief Minister inyaker. Pa jail nung puokba ya aikati 'ochi pukümer ka jail nung puok' ama bilemer. Ashiko, tema nung ochi pukümer ka süaka telung nungbo pai aibelena alitsüa akok. Kejriwal-i 'India Against Corruption' movement nung shilem agia aruba sülen 2012 küm pai AAP tentet aser 2015 küm nungbo AAP-i assembly menden 70 aliba Delhi Assembly election nung menden 67 tashi nung takok angu. 2020 küm Delhi assembly election nunga AAP-i menden 62 tashi nung takok angu. Yimtenren tsütsü mongintemi Kejriwal ya Hindu pusemer ka aser Muslim nungertem anema inyaker kata masü saka nübur ajak tenzüker ka, ta züngshir. Delhi Excise policy ken o ya 2022 küm CBI-i benoka liasü saka tang Lok Sabha election atongtsü mapang ka nung ang Kejriwal apuba ya aikati ashishir. Kasa ken o nung tamalen AAP lenirtem, Manish Sisodia aser Sanjay Singh nata pua lir. Ochimashi ken o balala nung central agency temi Opposition lenirtem ang teimba apuba ajanga alima dang noksa tamajung sayur. Tawa Kejriwal apuba sülen US, Germany aser United Nations-ia India dang Judiciary-i ochishia iba ken o angadangsü metetdaksüogo. Kejriwal maneni jail nung puokra ibaji ajanga AAP dang masü saka Opposition jenjanga tamajungba akümtsü südi ta bilemer. Tang ED aser CBI ama central agency temi benokba ken otem shilem 90 dak temabo opposition lenirtem anema benokba ken o tem lir. Ano külen opposition lenir kari BJP nung denra parnok anema bushisüngdangba anenadoker, ta tai tonglokja opposition party temi iba dangji 'washing machine' ta ajar. Tang India nung central agency temi tim mesüi inyakba reprangteta alima linüktemia India nunger inyakyim ashishia ola adoker südi ta bilemer. Item ajakji ajanga India tenüngsa menüker.

OLEMSABANG

Arogo-i tasü-ita ochi yimyim yimtsüla

~ L. Kika Pongener.

Arogo ya alima yimden bangdak aser loktiliba ajunga metongshitsüba sabang ka asütsüla. Arogo-i sorkar, yimden aser loktiliba nung ochimashi mapatem (Corruptions) anema tasü-ita ola adoktsüla. Yisu alimai aruba ya ochimashi mapatem anema raratsü aru. Pa alimai arur külen, pai alima nung aliba lokti ajunga nuji kümdaktsütsü atema tasü-ita jembia aser nokdak. Yisu-i Pilate chuba dang ashi..."Ni ochi indang küli agütsütsü aso, aser aji asoshi ni alimai aru" (Yohan-18:37 b). Ano Yisu-i ashi..."Alima nung yimjung adokdaktsütsü ni aru ta tebilem ; yimjung masü, saka nok adokdaktsütsü ni aru" (Mathi-10:34). Atangji, Yisu alimai aruba ya tiyazü, meshitak, tamajung aser ochimashi mapatem anema raratsü aru. Anungji arogoi Yisu-i inyakba ama ochimashi mapatem anema tasü-ita ola adoktsüla. Tanü Tsüngrem tenzüker aikati arogo-i yimden nung tebang maitsüla ta anemsu o jembia ajem-ajema aliba angudang sasa-a repranger.

Arogo-i ochimashi mapatem anema ola atoktsü atema... Tamasa arogo telung nung ochimashi mapa inyakbatem yanglushitsüla aser melenshitsüla. Tanü lim arogo teimba ka ochimashi aser chidiyungdi agi sunga lir. Anungji asen lima teraksa yanglushidi ta bilemra... Tamasa arogo inyakyim nung ochi inyaktsü tenzüktsüla. Terasatsüka, tanü Tsüngrem lar aikati Pulpit nungi temenen indang sayutsüngitsü temulong mouluteter, kechiyong Tsüngrem lartema aika temenen nung asonga lir. Yongji, Tsüngrem lar aikati temenen indang sayutsüngitsü melena, alima nung alidang taküm anisungzüka junga alitsüba, sadem-sadema alitsüba, iba indangji dang sayutsüngir. Tanü Tsüngrem lar aikati tasü-ita ochi indang sayutsüngi mesuteter, kechiyong Tsüngrem lar aika ochimashi mapa nung nokdaka lir. Tanü asen lima nung arogotemi ochi yimyim mayimteter, kechiyong tanü lim arogotem inyakyim nung ochimashi mapa agi sunga lir.

Terasatsüka, tanü putu ya ochi inyakba aser ochi jembiba atala-a sense-masaba putu ka kümogo. Shirnoki ochi jembir aser ochishia inyaker parnokji atala-a menutsüba putu ka kümogo. Shirnoki ochishia inyaker aser ochi jembir parnokjibo timtema sensaka dang alir aser lenmang aisu nung tetsükdaktsü ajurur. Ajisuaka, shirnoki tiyazü aser anemsu agi tulurtem sanga jembir aser ochimashi inyaker, parnok-jibo takar küma jangradema aliba putu ka kümogo. Aji oda, ochimashi mapatem to-ang ochi mapa kümogo, aser ochi to-ang ochimashi mapa kümogo. Atangji, tanü asen lokti nung ochishirbo jenjang maka kümadokogo. Lokti ajunga nung tanishir/lennir shimdanga ochishirbo meshimer, kechiyong ochishir alidakji, ochimashirtem ochimashi mapa inyaktsü mesademer. Atangji, tanü asen lima nung ochishir nokdaka meliteter, ochishirji pa/la kija (Single out) küma-adoker. Shirnoki ochi jembir parnokjibo nubur ajungai sempar aser arishir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

WEA Secretary General Thomas Schirmmacher mapa nungi anenogo



Thomas Schirmmacher

Rongchii/April 02 (Agencies): World Evangelical Alliance Secretary General Thomas Schirmmacher temang manemba mechi mapa nungi anenogo.

Schirmmacher ya pa indang mezüng kümsük medemaka züngsem million 600 aliba World Evangelical Alliance nung secretary general ka ama Deobarnü mapa nungi anen, koba February 28, 2026 tashi inyaksü liasü.

COVID-19 mechi pa mapa nungi anenba WEA International Council ajanga mulungsoa agizükogo, ta WEA ajanga Hombarnü sangdong ka nung ashi.

WEA International Council indang mendenpuba Goodwill Shana ya ita trok tashi WEA indang tekolakba inyaka atatsü aser iba mapang council indang Human Resources Committee ajanga Office of the Secretary General indang inyakyim asadangtsü aser iba sülen secretary general aser CEO tasen atema shimba inyakyim kar yanglutsü imlar.

"Schirmmacher ya mapang talangka nungi WEA, yangji national members aser commissions den tesendaktep tajung lia aru. Pa dak shisatsü jenti aliba ajanga Laishiba otsü ochishia zülua aruba ajanga aika ajungmesor," ta WEA sangdong ajanga ashi.

"International Council of the WEA ajanga WEA kibong aser tembar temi Tsüngrem lenisüba, shisatsü aser taochi asoshi sarasadem aser teyari imla atar."

Schirmmacher ya Germany nung aser pa ya professor aser Anglican archbishop coadjutor lir aser pai 2021 küm Secretary General Efraim Tendero nungi mapa agizüka liasü. Efraim Tendero ya kümsük ka inyaka aser aji masüdag Geoff Tunnicliffe aser Jun Vencer nungeri kümsük ana-na inyaka liasü.

Executive chair ama Shana yagi deputy secretary general ana (Peirong Lin aser Samuel Chiang) indang team ketdang

asütsü. Deputy secretaries general indang mapa ya Tendero kümsük mapang Office of Secretary General kumtetsü asoshi tenzüka liasü aser Schirmmacher kümsük nunga inyaka aru.

Schirmmacher ya doctorate pezü ngua lir, ka 1985 küm ecumenical studies nung, ka 1989 küm cultural anthropology nung, ka 1996 küm ethics nung aser ka 2007 küm sociology of religion nung angu. Pa ya honorary doctorates asem lir.

WEA tekolakba makumdang Schirmmacher ya iba global Evangelical body nung Theological Concerns and Intrafaith and Interfaith Relations indang associate secretary general inyaka liasü.

Pa ya Archbishop William Mikler kübok Communio Christiana indang archbishop coadjutor lir. Yangji pa

Communio Messianca tsütsü tali inyaka liasü, koba ajanga linük 75 nung aliba Oriental background nungi arogo balala sendaktepsür.

"Lenir aikati küdak tamang akaba atema ni ajemalur. Mapang talangka lenir ama inyaka aruba ajanga WEA ya ozü ki ama bilemer," ta Schirmmacher-i 2021 sangdong ka nung shia liasü.

2021 küm pai Secretary General mapa agizüka jembidang Laishiba ya arogo indang kuli agütsüba lir aser "paper pope" ka lir, koba agi tamangertem anir, ta shia liasü.

"Paper Pope ka aliba atema asenok tejak tenteter, kechiaser Paper Pope yagi ni densema asenok shinga Tsüngrem o dang temaba masü ta sayur. Asenok ajaki Tsüngrem o nem bendanga agütsür, shinga iba dang temaba mali," ta Schirmmacher-i ashi.

Schirmmacher yagi October 2015 nung The Christian Post atema articles aika zülua liasü aser iba mapang pai Rome nung agiba Vatican Synod on Family nung ajangshiba indang shia liasü.

WEA secretary generals ya WEA indang International Council ajanga küm pongu kümsük atema shimer. Nisung kati WEA indang secretary general ama kümsük aika inyaksü akoker.

Haiti nung Catholic priests aser nun tem pua bener aor

Port-au-Prince, Rongchii/April 02 (Agencies): Mapa tamajung inyakba telok temi Haiti amokbangba tali akumdang, tashiyim amshia nisungtem pua bener aoba ajanga nüburtem maneni tsüpokdaksür aser Catholic putir aser danga missionary tem dak tali rangloker. 2024 küm kisüng nunga putir aser religious brothers aser sisters 14 pua liasü.

Tesüiba küm asem tsüngta Tir Jovenel Moise tepset aser criminal gangs temi linük yimtiba Port-au-Prince agitsü tenzüka nisung apur temi linük nung sen timba aruba professionals ishika aser sen aika meshitetsü südi ta amangertem dak tenük yok tenzüka.

Makamait Haiti linük nung item rongnung putir aser tamangba yimsü balala nung lenirtem dena lir.

March ita tetenzüklen danga sister ana den külemi pua bener aoba nun kati osangbener dang ashiba agi, parnok apur temi parnok alangzüktsü atema sen million \$2 meshia liasü."Iba ama sen bendentsü ya khenyongi tamakoktsü," ta iba

nun yagi la tenüng temai madokdaksüi ashi.

Iba telok yagi anogo ka lir senjang kata mongui nun tem ya chiok aser parnok ya parnoki auyaba gari ana nung anir arua yutsü.

"Nisung apur temi alangzüktsü atema sen meshiba ya onsara lir. Parnoki sen dollar meyirijang aika aser khen-khenbo million aika meshir," ta Conference of Religious of Haiti indang secretary general Rev. Gilbert Peltrop-i ashi.

Catholic priests, nuns aser brothers tem tenüng nung Peltrop-i küm asem tashi nisung apurtem den sen agütsütsü atema jembia arur.

Pua ayurtem ya mapang ka-ka züka merenshir, kar anogo ana-asem chiyongtsü aser tzu magütsüi ayur. Parnok tzu magi anogo aika alitsüsa akumer, ta Peltrop-i ashi.

Rev. Jean Nicaïsse Milien ya 2021 küm prangbong bena alir nisung ter dak tema arua pa pua bener ao. "Küden nisung toku pua bener aro. Yangji putir pongu, nuns ana aser lay Catholics asem liasü,"

ANOGO ABEN TSÜNGREM DEN

Aroka tera ayangba

"Nenek dang sayuba tamang nung akangdakja, tenüngsang kanga agüja Pa den jajaang".

- Kolosi 2: 7.

Tera nükjidongji ali nungi temo bendena kongsangtem nem agütsütsü aser tejang tangdaksütsüba lir. Süngdong lidong taküm indang bushirtemi mezüngbuba teraji repranger. Kasaji, tanela tsütsüa asenoki tamasa kimongji reprangtsü tenüngdaksü. Asenok Khrista nung tera yanga liaka iba jagi süngjang tangtsütsü ta meshitet. Tamanger aikati tera ayanger saka Khrista dak alema tanga nung bendanga agütsür. Laishiba ajunga nung alima osset nung masü, Khrista dak dang temulung agütsütsü asenok nem tekümdangtsü agütsür. Aseni meimba tushir, sen endoker aser mapang endoker.

Kolosi 2: 7 tongtambang onükji tera ayangtsü asoshi Khrista aser Pa mapa-ji lir ta sayutsüla. Jajaba, mesüba, tanur ama ainba, bushiba aser asemba ajak jagi asenok Khrista den sendaktepa aliba sayur. Asenok tesendaktep akangdaksüba tongtambang yimya kaji tenüngsang agütsüba. Tsüngrem temoatsütem asoshi tenüngsang agütsüba nungi tesendaktep tenzüker. Ne tenüng asanger ta tenzüker.

Oba, Khrista nung teyari ajak agütsüba asoshi Ne tenüng asanger.

Yisu Bushiba

Aser Simon aser pa den alirtem Pa sülen anidaka ao. Mark 1:36

Osangtajung kakettertem nung Simon Peteri meshisadangi jepdak jembiba asenoki angur (Matt. 16:22; 17:4; 26:33). Saka Peteri teti Yisu sülen anidak. Peter oji oji ta Yisu sülen anidak (Matt. 26:58). Kodang Peteri Yisu shia aruba angashi pai leperi asema ao (Lk. 24:12). Peteri Yisu dangi aritepa tzu waa ao (Yn. 21:7), aser Yisu den aotsü tzu manung jaja (Matt. 14:29). Peteri tetibo shidak mejembi aser meinyak, saka pai teti Yisu den alitsü bushi. Iba jagi pai teti Kibuba den ajurutep aser tamang katetba nütsüng ka aküm.

ta pai ashi.

Parnok ajak ki tilaka nung külemi ayu aser yangji ali nung mejangdaksü aser achi-ajemtsü atema chi aser am tala agütsü. Hopta asem lir parnok ya chiok, aser parnok chioktsü mapang achi-ajemtsü kecha magütsü.

Parnok apurtem ya Haiti nung gang tulu 400 Mawozo nung shilem ka lir aser parnoki apur indang cellphone tem meshi aser kinungertem den jembia nisung shia sen million \$1 meshia liasü.

Taoba ita pua bener aoba sister-i ashiba agi, la ya lar arogo indang school nung mapa inyaka lia mapa tamajung inyakerem jara alema aita school ya amokbang.

"Onok asem pua bener ao aser tanurtem anepalutsü atema ana yutsü. Parnoki anogo nung khen dang chiyongdaksü aser anogo ana atema tzu liter ka agi ozü asem lemsatepa ajem," ta lai ashi.

Parnok ya tasüng nikongdang 6:00 ako meta chiok. La tang tashi tetsübotatenten nung lir. Parnok temang shi nung timtem

majuruaka temulungjang nung taoksaba liasü, ta lai ashi.

Mapa tamajung inyaker timbai putirtem ya takar ama bilemer, kechiaser Catholic school aika lir aser ki aser gari tem lir, ta Peltrop-i ashi.

"Kaket reju tulu ama sen indoker ta parnoki mememet. Aser parnoki bilemba rongsen ya Adveniat ama international Catholic charities nungi tenla arur ama bilemer," ta pai ashi.

Saka nisung kari Haiti nung missionary tem pua bener aoba ya sen atema kisüng masü danga kulitem asoshia alitsü akok, ta ashir.

1950s nungu 1980s tashi Duvalier kibongi Haiti nung yimsü asüdag sorkari mapa tamajung inyakba atema arogo tem ola madoki liasü. Haitian Catholicism melenshia arogotem makamaiter anasabai bener aruaka Haiti nung alir aikati Catholic nungeri ya linük indang power structure nung shilem ka ama bilemer.

Arogo temi sayutsüngia tanüla anir aruba nung temulung tali agütsütsüla aser nüngdabapur yaritsü asoshi mera tajung agitsüla ta ashir.

OLONG PAITEP # 6745

Grid for Olong Paitep # 6745 with numbers 1-16 in various positions.

TIPIEN

- 2. Auonungchiyongsüasenba
5. Mangyimba mapang
7. O tamendakdak
8. Peidak malangba
10. Juli
12. Sen ayudak
14. Tenük agi ajitet
15. Tamajung aküm
16. Apuso

LANGTSÜNGLEN

- 1. Lenmang
2. Aor kidong ka tenüng
3. Tenarong maten
4. A _ _ _ g
6. Mopung apodoka
9. Tongtipang tagitsü
10. Menungra bilem
11. Aiür
13. S _ _ _ k
14. T _ _ _ r

OLONG PAITEP # 6744 TELANGZÜBA

TIPIEN :

- 1. Yiar, 3. Tesola, 7. Yimra,
8. Tangar, 9. Peria, 10. Tanur,
11. Tasen, 13. Lemjem,
15. Tambu, 16. Khuret,
17. Sang.

LANGTSÜNGLEN :

- 1. Yimti, 2. Amen, 4. Shiner,
5. Alaka, 6. Satan, 9. Putet,
10. Tembar, 11. Tatok,
12. Amang, 14. Jala.

NAI-A YA METETTER MA

NISUNG TEIMTIBAI VOTE ENOKTSÜ NANGZÜKBA



Greater Chennai Corporation kübok Chennai North Constituency nung alima otsü tasen ka yangluogo aser ibaji ghonda 12 tsüngda nisung teimtibai election ka nung vote enoktsütsü tenangzükba agiba lir.

12 tsüngda 410,988 pledges aru aser ibaji Elite World Records aser India Records Academy ajanga kulisüogo. Elite World Records nung adjudicator Archana Rajesh aser India Records Academy nung senior records manager Jeganthan Palanisamy nati Greater Chennai Corporation nem tenüngsang agütsüba kulikakettem agütsüogo.

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiriyim@gmail.com nung yokang mesüra Tir Yimyim bureau tem nung agüjang.

Form with fields for Name, Address, School, Class, and other details.



Arunachal kübok Balijan nung kibong 200 temai BJP nung aden



Itanagar, April 2, 2024

(Agencies): Assam aser Arunachal Pradesh arrtsü anasa aliba Balijan jila nung kibong 200 temai Bharatiya Janata Party (BJP) nung denogo.

Lower Balijan kübok Tubung aser Balijan Panchayat nung

BJP candidate Tana Hali Tara pusemer aika akümer. Pa ya Doimukh constituency nungi taoba MLA lir.

Karbi, Nyishi aser tanga kintem nungi züngsemtemi BJP nung adener aser iba ya BJP lenisüba kübok terenlok angutsü nükjidong nung lir.

Testüiba küm pungu tashi BJP lenisüba kübok terenlok aika nguogo. Infrastructure projects tongtipang aika aser talisa aputem yanglutsüogo aser iba ajanga Balijan, Tarasso aser tanga tesemtem sendaktepogo ta iba tesem nung alirtemi ashir.

Kaziranga National Park nung shikarir ana apu

Guwahati, April 2, 2024

(Agencies): Assam Forest department aser police-i Nagaon nung shikarir ana puogo. Tena yagi Kaziranga National Park aser temeket nung arem shiruru aika khasetogo ta osang angazüker.

Tena ya Ohinath Orang

asere Chamung Timung na ta jangjaogo aser tena ket nung handmade gun, injang aser mobile phones ana ngutetogo.

Based on the inputs, an investigation was initiated that led to Orang and Timung.

Nisung kari arem shiruru

shikariba osang tejangja kar angazüba sülen bushitepa arudang Orang aser Timung na apu ta police-i ashi.

Tenaprongi arem shiruru shikariba nung shilem agiogo aser iba dak sendakba nung maneni bushisüngdang südar, ta police-isa ashi.

Ex-Manipur MLA aser BJP lenniri Congress nung aden

Imphal, April 2, 2024

(Agencies): Manipur nung taoba Yaiskul MLA Elangbam Chand Singh, BJP lenniri Sagolsem Achouba Singh, advocate Oinam Hemanta Singh aser Thoudam Debadatta Singh nunger Congress nung denogo.

Imphal, Manipur nung aliba Congress Bhawan nung parnok pelaa agizükba sentong ka agia liasü.

Outer Manipur Lok Sabha constituency nungi Congress candidate Dr Angomcha Bimol Akoijam-i parnok pelashishia agizük.

Sen aser tashi balala ajanga masü saka Manipur nung alirtem asoshi inyaksüpur candidate tem shimtsüla ta Dr Akoijam-i ashi.

Sensotemi Manipur longjema alitsü aser loksaa maotsü atema bilemstüla kechiyong Manipur nung movements balala ajanga maitsü kümzüka aruba otsütem lir ta pai ashi.

"Tanü Manipur tetezü samaa aotsüsa tensa ka ajurua lir anungji senso ajak longjemstüla aser state loksaa aotsüsa mapa inyakbatem nungi kümzüka ayutsüla" ta Dr Akoijam-isa ayongzük.

Outer Manipur constituency atema April 26, 2024 nü polling asütsü aser April 19, 2024 nü Inner Manipur constituency nung polling asütsü.

Lok Sabha elections jakdang ketdangsürtemi yi aika apu

Lok Sabha elections agitsü aliba jakdang Manipur excise department-i April 2 nü Rs.

30,000 shi alang country liquor raksaa endokogo.

Ozüng alema yi ayokba osang tejangja ka angazükba sülen Manipur police aser excise department ketdangsürtemi Bishnupur district kübok Nambol bazaar nung yi ayokdak aika mita ao.

Iba mapang country liquor 1000 litres shi apuaba raksaa endokogo aser ken o kar benokogo.

Lok Sabha elections atema police inspector ananai aniba special enforcement teams tentetogo.

Lok Sabha election 2024 tiptema agitettsü asoshi State Nodal Officer (Excise), Manipur nung 24x7 Excise Control Room aser helpline lapoka lir.



Assam kübok Golaghat nung police-i drugs shibelena ka ket nungi apuba heroin angur. Iba nisung ya Ajay Singh ta jangjaogo aser pai Nagaland kübok Dimapur nung heroin alir Golaghat nung ayoktsü atema bener aruba liasü. Osang tejangja ka angazükba sülen police-i Nambor Forest anasa Juria Dolong nung mita atadang Ajay Singh apu. Pa ya drugs shibelener ka dang masü saka motorbike auyar ka ama temulung melempi bilemer.

Gaza nung World Central Kitchen inyakyim anener

Gaza City, Rongchii/April 02 (Agencies): Israel-i tayimtsü amshia amakba mapang international food charity World Central Kitchen (WCK) nung inyaker nisung tenet asüba sülen Gaza nung KCK inyakyim anena atar.

Asürtem ya Hombarnü central Gaza nung aliba warehouse ka nungi aoba aid convoy nung liasü.

Israel Defense Forces (IDF) ajanga iba tatalokba asadangtar ta shiogo.

Gaza nung aliba Hamas meyong media office-ia Israel tenüng asener.

Gaza nung teyari kangasa nüngdaka alir nem teyari agütsürtem rongnung WCK ya ka lir.

Parnoki tarutsü asoshi telemtetba tekeraba nung agitsü ta shiogo.

WCK ajanga ashiba agi, aid convoy ya tzi lenmanglen nungi Gaza-i humanitarian food aid tons 100 dak tema bener arutsüba Deir al-Balah warehouse nung yutsür aoba mapang amak.

Iba convoy nung gari asem liasü aser ana armoured liasü.

Iba convoy senzüba indang IDF den osang agitepa aliba mapang amak ta WCK-i ashir.

WCK nung mapa inyakertem

ya WCK logo aliba bullet-proof vests agir liasü, ta Palestinian medical sources ajanga osangbener dang ashir.

Ghonda aika timtema operation agiba sülen tasümanng tenetprong ngutetogo, ta Palestine Red Crescent Society ajanga ashir.

Parnoki ashiba agi, tasümanng ya Gaza south tsütsü Abu Yousef al-Najjar hospital bushia bener ogo aser iba sülen Rafah arütsüle nungi Egypt leni bener aotsü.

Iba tatalokba tematiba jenjang nung angatetsü meranger aser onoki bushitetba tejangja lemsateptsü, ta IDF odongtar Rear Adm Daniel Hagari-i Mongulbarnü ashir.

"WCK mapa ya kanga tongtipang aser meimchir atema frontlines lir."

Gaza nung aliba nüburttem nem chiyongtsü aser danga teyari oset agütsüba mapa tajung inyakba nung IDF ya World Central Kitchen teka ampeter inyaka arur, ta Hagari-isa ashir.

Asürtem ya Australia, Polish, British, Palestinian aser ka US-Canada senso lir ta WCK ajanga ashir.

"IDF-i tenük yoker amakba ajanga takum samaba asoshi World Central Kitchen aser

alima temulung raksar süngmanger," ta WCK indang CEO Erin Gore-i sangdong ka nung ashir.

"Parnoki nüburttem mesüba aser ajak dang meimchir takum temaba ta sayutsü temulungtetba aser parnoki nisung aika takum melenshütsüba teti bilemtettsü."

October ita nungi tenzüka tang tashinung Gaza nung aliba nisungtem nung chiyongtsü million 42 dak tema agütsüogo aser ano million ka dak tema agütsütsü renema lir, ta WCK ajanga tawa sangdong ka nung ashir.

Saka ano iba lendong atalokba sülen US nung amenoka aliba American Near East Refugee Aid (Anera) ya Gaza nung operations anena atar ta sangdongogo, koba WCK den külempi inyaka liasü.

October ita nungi tenzüka Gaza nung aid workers 196 dak tema tepsetogo ta Aid Worker's Security Database ajanga ashir.

Hamas teloki October 7 nü Israel south tsütsü arütsü alema aita nisung 1,200 tepseter 253 pua bener aoba sülen Israel mitkari Gaza nung military operations tenzüka tang tashinung nisung 32,926 tepsetogo ta Hamas meyong health ministry ajanga ashir.

Haiti nung azütokshi tali küma aoer

Port-au-Prince, Rongchii/ April 2 (Agencies): Haiti nung yimden yimsütsüba tsütsü mepetmesü tulu adoker aliba bentettsü atema nongshiba mapang tang asendenshir azütokshi lendong tali ataloka odar, kechiyong ozüing alema inyaksangshiba teloktemi police tem maka arudar.

Hombarnü aonung ozüing alema inyaksangshiba teloktem yagi tesem balala amak tenzük aser linük yimtiba Port-au-Prince nung police tem den mangatettep adoka liasü. Ato kilonser Ariel Henry-i, sorkar tasenba amenoktsü atema inyakimtem achaayangtsü asoshi transitional council ka tentettsü tenangzüka agütsüba ashishiba mapang ka nung tang iba azütokshi lendong ya atalokogo.

Tenük kuli agütsürtemi ashiba agi, national palace anasa Champ de Mars nung public park nung khatep tenzüka liasü. Hopta aika mepetmesü tulu adoka aruba sülen ano asendenshir iba lendong atalokba ajanga nüburttem aoksatepa liasü.

Osang ajanga ashiba agi, Hombarnü aonung linük yimtiba temeket nung nisung pongu tepsetogo aser nisung aika yimti teyong nung ghonda aika sabanger liasü.

Iba lendong nung police ketdangsur pezü tashi yiruba onsang metetdaksüogo. Local media sangdong balala ajanga ashiba agi, police tem ya armoured vehicle ka nung jena ao koba mapa tatsüka lir item

teloktem yagi rongtokja liasü. Broad transitional council ka amenoktsü atema tenangzüka agütsüba dak sendakba nung mapa toktsür aliba Ato Kilonser Ariel Henry-i temulung melemi bilemba indang lemsatepba mapang ka nung tang ano asendenshir mepetmesü tenzüko.

Küm aika sensaktia, yipru mopung aser menoknok amala lendong balala, yimden yimsütsüba tsütsü tamendakdak takang ka maliba aser ozüing alema inyaksangshirtemi azütokshi lendong bener arutsüba sülen Haiti nung 2021 küm Jovenel Moise tepsetba sülen Tir aser sitting parliament ka mali. Linük nung tatemsa 2016 küm election agia liasü.

Mepetmesü tulu adoka aruba sülen February ita tatemlen nungi ozüing alema inyaksangshiba teloktemi police station, tepuokdak aser airport tem amak tenzüka ajanga mepetmesü tali kümogo.

Taküm küm tenzüker mezüngbuba ita asem nung nisung 1,500 dak tema tepsetogo aser police temi mayimjemi aliba tesemtem nung ozüing alema inyaksangshiba teloktemi nisung 60 dak tema tepsetogo, ta United Nations sangdong ka ajanga metetdaksü.

Item teloktem yagi Henry mapa nungi anentsü atema takhangba agüja liasü, shiba Moise asüba sülen election magi-i PM küma liasü.

Henry shiba linüki maruteti tang tashi bendanglima nung

jenoka lir, pai March 11 nü sangdong ka ajanga, transitional council koba ajanga Ato Kilonser tasenba shimtsü iba council amenokba sülen pai mapa toktsütsü ta shia liasü.

Ajisüaka iba council tang tashi metenteti arudar, kechiyong political party tem aser ken o dak sendaka aliba teloktem tsüingda tangatettep ka dangi maruteti lir.

Maneni tensa tamajungba kümshidakja Hombarnü Henry indang office sangdong ka ajanga, council ya tang tashi metenteti, kechiyong iba amala lokti tentet ka tentettsü atema Haiti indang temzüng ozüing nung temelaba agüja mali, ta ashir.

Henry-i tang CARICOM nungi shisatsü agidar, shirnoki sorkar melenteptsü asoshi inyakimtem achaayanga arudar.

Kasa mapang nung azütokshi lendong balala maneni atalokyonga aoba mapang ka nung Haiti nungertem chiyongtsü, mozü aser tanga tenüngdakba osettem agi anüngba ajanga kanga timtemtepa arudar.

Haiti dangi US ambassador tasenba Dennis Hankins Hombarnü Haiti tongaogo. United States aser tanga linüktemi Haiti nungi parnok lisopurtem aninba mapang ka nung US ambassador ya iba linük tongaogo.

Hombarnüsa Mexico-i tanur tenet aser diplomatic ketdangsur pezü densema lisopur 34 military indang rong ka nung anir ogo.

**IN THE GAUHATI HIGH COURT
(THE HIGH COURT OF ASSAM : NAGALAND : MIZORAM AND
ARUNACHAL PRADESH)**

**KOHIMA BENCH
W.P.(C).NO. 132/2023**

Smti. Imsunaro ----- Petitioner
- Versus -
The State of Nagaland & 6 Ors. ----- Respondents.

To
Shri. Imnaodang Jamir,
Son of Shri. K. Toshi Jamir,
Resident of Ungma Village, Mokokchung, Nagaland.

NOTICE UNDER ORDERV RULE 20 OF THE CODE OF CIVIL PROCEDURE, 1908
Take Notice that the above noted Writ Petition No. 132/2023 has been filed by the above named petitioner before the Hon'ble Gauhati High Court Kohima Bench, where you have been impleaded as respondent No. 7. The Hon'ble Gauhati High Court, Kohima Bench vide Order dated: 21-03-2024 issued notice to you to appear before the Hon'ble High Court on the next listed date i.e., 22-04-2024 either personally or through pleader to act on your behalf and show cause, if any. If you fail to appear on the date so referred, the matter shall be heard and decided ex-parte in your absence.
Given under my hand and seal of this court on this day the 01st April 2024 at Kohima.

**Deputy Registrar (Judl.)
Gauhati High Court, Kohima Bench**



Israel-i tayimtsü amshia amakba mapang international food charity World Central Kitchen nung inyaker nisung tenet asü, ta ashir. Parnok ya rong

ajanga chiyongtsü aser danga teyari oset bener aruba Gaza Strip kübok Deir al-Balah jila nung yutsür aoba mapang parnok mena aliba convoy nung Israel sepaitemi tayimtsü amshia amak ta ashir.

Biden-i Israel nem sen billion \$18 jenjang hadir agütsüner

Washington, Rongchii/April 02 (Agencies): US Tir Joe Biden indang administration ajanga F-15 aircraft ter dak tema densema Israel nem sen billion \$18 jenjang arms transfer package agütsütsü asü masü ta asadanger, ta osang kar ajanga ashir.

Israel-i Gaza amak metenzükdang nungi F-15 fighter jets 25 ayoktsü atema kanga asameyanga arur, kechiyong US dang January 2023 nung iba tayimtsü ayoktsü asüingdanga liasü. Item tayimtsü ya yokra Israel ket nung F-15 fighter jets 50 akumtsü.

Taoba hopta Israeli Minister of Defense Yoav Gallant-i Washington semdanga National Security Advisor Jake Sullivan aser Secretary of Defense Lloyd Austin nungertem densema US ketdangsurtem den jembishinü akaba mapang iba tayimtsü ayoktsüba indang kanga nenshia mepishi, ta osang kar ajanga ashir.

Israel-i Gaza amakba ajemtsü mechi bendanger tembar linüktem, human rights groups aser Congress nung külem Democrats kari hadir agütsüba nung tenokdangba kar agütsütsü jemiba arur. Gaza nung Palestine nung nisung 32,845 takum samaogo aser itemji timba civilian tem lir ta ashir.

Congress dangi asünga tayimtsü ayoktsü atema osang yok yonga tayimtsü ya tekeratiba agi 2029 tashinung ang agütsüettsü, ta US ketdangsur kati ashir.

Israel-i warplanes fleet tali ulushia akumtsü merangba ya Hamas den raratsü atema kising masü saka tarutsü nung

Tehran-i yariba Lebanese armed group Hezbollah aser Iran nungi timtem magütsütsü asoshi lir.

House of Representatives Foreign Affairs Committee Chairman Michael McCaul-i January 30 nü F-15 ayoktsü temelaba agütsü ta ashir.

"Administration Congressional tsüingta F-15 ken o jembi tenzüko saka hadir agütsütsü asoshi ketdangsur pezü meyongnem agütsütsü aliba ano magütsü lir," ta osang ka ajanga ashir.

Bendanger dang mitkar oset tongtipang ayoktsü atema Congress nem metetdaksütsü US ozüing nung shia lir aser parnoki pangzüng renema nokdangtsü akoker, ajisüaka tesüiba mapang iba ama pangzüng ya kodanga yanglua mali.

Israel nem teyari agütsütsüba nung F-15 aircraf 50 aser support services, training, maintenance, sustainment aser jets lifecycle nung contractor supports dena lir, koba küm 20 shi tashi alir, ta ashir. Israel-i F-15 meshiba agütsütsü Biden administration-i mulunga lir ta ashir.

Ajisüaka Israel-i Gaza Strip south tsütsü Rafah yimti amaktsü sentong aliba atema Washington-i yimjak nung khuret lemsatepa arur.

Item tayimtsü ayoktsüba ya Ukraine aser Taiwan densema bendanger nem sen billion \$95 jenjang national security supplemental spending package agütsüba nung Israel asoshi Biden-i Congress dang sen billion \$14 meshiba nung maden.

Washington-i küm shia Israel nem military assistance nung sen billion \$3.8 indoker.

Indian tebur hockey team asaya 5 atema Australia-i ogo



Rongchii/April 2, 2024 (Agencies): April 6 nü nungi tenzüka Australia team den asaya pongu asayatsü atema India tebur Hockey team Australia-iogo. Paris Olympics atema renemshiba mapang iba asayamung ya kanga tongtibang asütsü.

Harmanpreet Singh-i aniba India team ya Hombar aonung apusoago.

India team tawa kanga junga asaya arudar aser Bhubaneswar nung FIH Pro League asayaba mapang parnoki asaya pezü nungi asembo kokogo.

April 6 nü mezüngbuba asayaba sülen tanungba asayatem ya April 7, 10, 12 aser 13 nü asayatsü.

Taruba Paris Olympics atema India team asayaba yimya tajungba küma yanglushitsü aser tashimait aliba tesemtem bushiteta

metongshitsü atema iba asayamung ya kanga tongtibang asütsü, ta Hockey India-i sangdong ka ajanga metetdaksü.

"Kanga dang tongtibang asayamung ka atema onok Australia-i aoba mapang onok tejangraba aser temulungtetba tulu nung lir. Paris Olympics matong tsünga iba asayamung ajanga onok tashi asadangtsü aser temelenshitsu alibatem melenshitsu atema maangka tajung agütsüsü," ta team mapuso tsünga Harmanpreet-i ashi.

"Asayaba moapu nung okok dak aketba sempet tajungtiba amshia asayatsü onok bendanga agütsür lir," ta paisa shisem.

Kasa mapang nung vice-captain Hardik Singh-i, "onok sempet aser tasatem arantgetshitsü atema team ka ama onok kanga meranga

inyaka arudar aser onok sempet dak temulung lemteta bilemer. Asaya kanga junga asayateta linük nem konang tetushi bener arutsüsü atema onok rangloker lir," ta ashi.

India team:


Goalkeeper: Krishan Bahadur Pathak, PR Sreejesh, Suraj Karkera

Defender: Harmanpreet Singh (C), Jarmanpreet Singh, Amit Rohidas, Jugraj Singh, Sanjay, Sumit, Amir Ali

Midfielder: Manpreet Singh, Hardik Singh (VC), Vivek Sagar Prasad, Shamsher Singh, Nilakanta Sharma, Rajkumar Pal, Vishnukant Singh.

Forward: Akashdeep Singh, Mandeep Singh, Lalit Kumar Upadhyay, Abhishek, Dilpreet Singh, Sukhjeet Singh, Gurjant Singh, Mohammed Raheel Mouseen, Bobby Singh Dhami, Araijeet Singh Hundal.

AIFF-i Deepak Sharma mapa nungi anentsüogo



Rongchii/April 2, 2024 (Agencies): Goa nung Himachal Pradesh club Khad FC nungi mezüngbuba IWL 2 nung shilem agiba mapang tetsür anati tena dak teka sangshiba indang ashishiba sülen anogo ishika lir All India Football Federation (AIFF)-i executive member Deepak Sharma mapa nungi anentsüogo.

Goa nung tatalokba sensak asemtsü atema Tir, tatong Tir aser senyur densema AIFF Emergency Committee senden ka Hombar nü mena liasü. Iba sülen AIFF Member Associations lenirtem sendena ka mena liasü.

"Deepak Sharma sendeni

jaok aser minute ishika ken o angadanga sülen pa senden toktsür aotsü tetuyuba agüja liasü," ta AIFF-i Mongolbarnü metetdaksü.

"Emergency Executive Committee senden ka tanü menogo aser ken o kanga junga sensak asemba sülen osang tejangja ka magütsü tashi football dak sendakba inyakim kecha nunga shilem magütsü atema Deepak suspend sütsüogo," ta AIFF-i ashi.

Executive Committee-isa, Pinky Bompal Magar lenisüba nung tentettsüba Ad Hoc Committee loksatsüogo aser ken o ya AIFF Disciplinary Committee dangi benogo.

"Tekümzüka kübok tetsür

football asaya ajungkettsü atema AIFF bendanga agütsür lir aser iba atema jenjang tapet agütsü. IWL 2 mapang Goa nung tatalokba ya AIFF-i tetsür football asaya ajungkettsü atema inyakba raksatsüsüa tuluba küma meyoktsüla. Iba ken o ya Disciplinary Committee dangi benogo aser kanga tongtibangsa agütsü," ta AIFF Tir Kalyan Chaubey-i ashi.

Iba tatalokba sülen Deepak ya Goa police-i apu saka Deobarnü bail nung chiokogo. Tetsür football asayar anati ashishiba sülen pa Goa nung Mapusa police-i Deobarnü apu.

Deputy Superintendent of Police (Mapusa) Sandesh Chodankar-i PTI dang ashiba agi, Deepak aija apuba section tem ya bailable asünung pa chiokogo.

Asayar ana yagi ashiba agi, March 28 aonung club kibur Sharma parnok indang takdangi ait aser tena dak teka sangshia liasü. Ajisiüka asayatem kari ashiba agi, Sharma-i kecha tai minyak. Sharma ya ano Himachal Pradesh Football Association indang secretary-general lir.

IWF World Cup nung Chanu tasembuba nung tembang

Rongchii/April 2, 2024 (Agencies): Tokyo Olympic silver medallist Mirabai Chanu, Phuket nung IWF World Cup 2024 Group B nung tasembuba jenjang nung tembangba sülen lai Paris Olympics atema India asoshi quota ka ngutetogo.

Chanu yiruba ajanga ita trok tashi masayai aruaka la IWF World Cup 2024 nung Group B nung tasembuba aser ajak senteper 12buba nung tembang liasü. Iba asayamung nung lai ajak senteper 184kg (81kg snatch + 103kg clean and jerk) ajungketa liasü.

La tatemsa Hangzhou nung 2023 Asian Games nung asaya aser iba sülen tang IWF World Cup 2024 nung asayaogo.

Kasa mapang nung taoba küm Riyadh nung 2023 World Championships-ia Chanu ogo, ajisiüka la Asian Games atema anema atatsü asoshi masayai liasü.

Temzüng ozüng kübok weightlifter tem taruba Olympics atema qualify asütsü asoshi 2023 World Weightlifting Championships aser 2024 IWF

World Cup nung kechi südir süaka asayatsü nungdaker.

Paris Olympics atema quota ngutetba sülen Chanu-i la indang officeia X account ajanga linük dang kanga pelaba lemsatapa liasü. Laisa, yirur aliba taneptsü anguba ya jangrademtsüka lir ta ashi.

Mirabai Chanu-i CWG 2022 nung seret 201 ajungketa gold medal angu. Laisa, 2020 Tokyo Olympics nung tetsür 49 kg category nung silver medal ngua liasü.

Mirabai Chanu-i World Championships kokogo aser Commonwealth Games nunga medal aika nguogo. Lai asaya nung shilem tajung agiba atema India sorkari Padma Shri award aser 2018 küm Major Dhyan Chand Khel Ratna award agütsüogo.

Maneni Chanu-i 2014 Commonwealth Games, Glasgow nung tetsür 48 kg weight class nung silver medal angu aser 2018 küm Gold Coast nung asayaba mapang gold medal anguba den otsü taseka yanglua liasü.

Stokes-i T20 World Cup nung masayatsü telemtetba agiogo



Rongchii/April 2, 2024 (Agencies): England Cricket Board (ECB)-i Mongolbarnü sangdong ka ajanga ashiba agi, all-rounder Ben Stokes-i pa lemluwa Test asayatsü aliba dak rangloker inyaksangshitsü atema taküm Twenty20 World Cup atema pa meshimtsü shiogo.

England team-i 2022 küm tesüsabuba T20 World Cup koker lir. Parnoki 2022 küm Australia nung asayaba mapang T20 World Cup tanabuba koka liasü.

Iba den bendenloksema ECB-i ashiba agi, Sri Lanka aser West Indies den Test asayatsü aliba nung ball aontsü atema temang anema kümmer atatsüji Stokes atem nukjidong tongtibangtiba lir.

Stokes temekok nung timtem aliba ajanga ball aontsü tetsükdaksü ajanshia liasü aser iba atema pa November ita surgery agiogo.

"Cricket asaya format ajak nung all-rounder ka ama shilem agitetsü atema ni bowling ontettsü asoshi temang anema kümdaktsüsü atema ni rangloker meranga inyakdar," ta England indang Test captain Stokes-i ashi.

"IPL aser World Cup nungi shilem magütsü atema telemtetba agiba ya tajangzü ka-a tarutsü nung ni janraba ama tabensa all-rounder ka akümtsü imla atar," ta paisa shisem.

2024 T20 World Cup ya West Indies aser United States nung June ita nungi tenzüka asayatsü.

BILEMDANGANG

"Peisasa azüoktetbaji sempet tajungtiba rongnung ka lir."